

ALAHADY PAKA - TAONA B



« Dia mba lasa koa i Piera sy ilay mpianatra anankiray nankany amin'ny fasana, ka niara-nihazakazaka izy roa lahy » (Jo. 20: 3 - 4)

Ry Kristianina havana, ankafaliana sy ankaravoana omban-tsodrano no iarahantsika mianakavy midera sy manome voninahitra an'Andriamanitra amin'izao Paka ankalazantsika an'i Kristy tafatsangan-ko velona izao. Paka fandalovana araka ny naverimbrentsika matetika nandritra ny karemy fiomanantsika amin'ny Paka, "Ady sy Dia" no làlana nandalovantsika, "Ady" amin'ny ratsy dia ny fahotana manapotika ny fiainantsika ary "Dia" mankany amin'ny fiainana miaraka amin'i Kristy. Tonga inty ny fotoana, nandresy tamin'ny ady i Kristy, niara-maty taminy amin'ny fahotana isika dia niara-mitsangana aminy koa amin'ny fandresena ny ratsy ka miditra amin'ny fiainambaovao. Fotoana vaovao izao hahatonga antsika ho génération des bâtisseurs satria raha mitoetra ao amin'i Kristy isika sy itoerany dia hamokatra be ary ho feno hafaliana ka afaka manorina fiainam-boavao dia ny EOY. Izany hafaliana izany no hifampizarantsika amin'izao fankalazana manetriketrika ny Paka izao. Vaovao mahafaly hifampizarantsika velona marina tokoa i Kristy. Nandresy ny farantampony ratsy rehetra izy dia ny fahafatesana. Nandresy niaraka aminy isika ka mitondra antsika tanteraka amin'ny fiainana vaovao. Izany ny Aleloia hiraina sy ankalazaintsika. Ny Aleloia dia midika fanomezam-boninahitra ary fiderana an'Andriamanitra, manambara hafaliana sy haravoana. Raha misy faniriana lalina amin'izao Paka izao àry

ka hifampizarantsika ilay hafaliana lavorary ao amin'i Kristy dia aoka ho feno Aleloia ny fiainantsika manontolo, hanambara ny Aleloia eo amin'ny manodidina antsika. Izany ny Paka ho antsika. Paka hitondra fiadanana ho antsika. Ary Paka manokana ho antsika eto Madagasikara ity taona ity satria taom-pahasoavana, taonan'i Lucien Botovasoa izay ambara fa olontsambatra amin'ny fomba manetriketrika ny 15 Aprily ho avy izao ny maha olontsambatra azy. Paka ho antsika izany ka ankalazantsika sy isaorantsika an'Andriamanitra hanomezantsika voninahitra azy satria malagasy iray ra amintsika no niara-nandresy amin'i Kristy. Miaraka mankalaza sy midera an'Andriamanitra amin'ireo olomasina izy araka ny vavaka ataontsika andavanandro amin'ny fiomanantsika ny amin'izany fanandratana azy ho olontsambatra izany.

Misy evanjely telo atolotry ny Eglizy vakiana androany, iray amin'ny maraina, iray amin'ny antoandro, ary iray amin'ny hariva. Ka ny evanjelin'i Md Joany no entiko hifampizarana amintsika sy hiarahantsika hidera an'Andriamanitra amin'izao fankalazana ny Paka izao. Mitantara ny zava-mitranga tamin'ny voalohan'ny herinandro dia ny Alahady izay andro lehibe fankalazana ho antsika. Tsy hoe resy ny Sabata sanatria izany fa fanorenana vaovao, fahariana vaovao ny fitsanganan'i Jesoa tamin'ny maty, manambara fidirana amin'ny fiainam-baovao. Tsy hoe ratsy ny fahariana sy ny fanorenana taloha fa noho ny fahotana dia lavo isika ka resy tamin'ny fakam-panahy.

I Kristy no niady ka nandresy ary tanteraka ny fitsanganan-ko velona, izany no mahatonga antsika mankalaza ny Alahady satria manambara fiainam-baovao. Nandeha tany am-pasana i Maria Madelena, manambara haizina sy fahafatesana ny fasana, izany hoe ny fahotana mamono ny fiainantsika. Tsy nahita ny fatin'i Jesoa izy ka lasa niantso an'i Piera sy Joany izay lasa koa namonjy ny fasana. Izany dia tandindon'ny fiainantsika anatin'ny fijaliana sy fahoriana, fasana manambara ny faharatsiana sy fahafatesana. Tsy handosirana ny fiainana tsizarizary fa avy amin'io no mitondra amin'ny fianana vaovao satria mandresy i Kristy.

Nandeha tany izy ireo ka nahita ka nino; Aoka ho fampianarana ho antsika izany, marina fa tsy nahita amin'ny mason'izao tontolo izao izy ireo satria raha izany dia tsy hahita na oviana na oviana ny fahasoavan'ny fitsanganan-ko velona izany fa amin'ny masom-pinoana no hijerevantsika azy tahaka ny nataon'i Md Piera sy Joany. Aoka ary entanin'ny fahasoavan'Andriamanitra isika ka hirehidrehitra ny fontsika tahaka an'ireo mpianatra nankany Emaosy raha teny an-dàlana izy ireo ka nivaofy ny soratra masina taminy i Jesoa, nisokatra ny mason'izy ireo ary masom-pinoana ka nahita an'i Kristy. Matetika isika no tsy mahita an'i Kristy amin'ny fiainantsika satria mijery araky ny mason'izao tontolo izao sy mihaino araky ny sofin'izao tontolo izao nefa i Kristy tsy mitsahatra mampianatra antsika ary tsy mitsahatra mampianantra antsika ny Eglizy.

Ry kristianina havana, izany no firariantsoa sy vavaka iarahantsika manao amin'ny Paka izao sy ny fiomanantsika amin'ny fanambarana an'i Lucien Botovasoa ho

olontsambatra izao mba hahiratra tokoa ny masom-pinoantsika, hisokatra ny sofim-pinoantsika, hisokatra ihany koa ny vavam-pinoantsika ka hanambara fa i Kristy tokoa dia nandresy ary izy no famonjena ho antsika.

Hanao tahaka an'ireo apôstôly ao amin'ny vakiteny voalohany mitantara ny asan'ny Apostoly isika, entanin'ny Fanahy Masina hanambara fa i Kristy tokoa efa nitsangan-ko velona. Hijoro ho vavolombelona isika hanambara an'izany amin'ny alalan'ny fiainantsika. Izany koa no nataon'i Lucien Botovasoa. Mila vavolombelona izao androntsika izao, vavolombelona mitondra fanantenana satria maro ny zavatra mandiso fananteanana antsika, mila vavolombelona manambara hafaliana tena marina amin'izao andro iainantsika izao. Izany no hita taratra tamin'i Lucien Botovasoa, hafaliana avy ao anaty fa tsy hafaliana fihatsarambelatsihy, hafaliana mitondra fiadanana nentin'i Kristy ka isaky ny miseho amin'ny mpiara-belona izy amin'izao Paka izao dia milaza hoe "Homba anareo anie ny fiadanana"

Enga anie ho maro isika ho vavolombelona mizara ny fiadanana, hizara ny fahamarinana, hizara ny fifankatiavana satria izany no mitondra amin'ny fihavanana marina.

Ny vakiteny faharoa mitantara ny fanorenana ny Eokaristia, ka i Kristy no mofo tsy misy lalivay izany hoe manambara ny fandalovana ny Paka niala tamin'ny fanandevozana tany Ejipta ka miditra amin'ny tany nampanantenaina dia izany no Paka ho antsika miala amin'ny fiainana tsizarizary mirefarefa amin'ny tany dia mandray ny mofo tsy misy lalivay izany hoe tsy misy faharatsiana intsony fa mofo vaovao ary tsy mety simba mandrakizay dia tsy iza fa I Kristy.

"Tsy fantatrareo angaha fa lalivay kely foana dia mampibonaka ny vongan-dafarîna manontolo? Esory re ny lalivay ela, mba ho vongana vaovao ianareo, sady efa voavono i Kristy izay Paka ho antsika koa aoka àry isika hankalaza ny fety tsy amin'ny lalivay ela, na amin'ny lalivaim-paharatsiana aman-dolom-po, fa amin'ny mofo tsy misy lalivay, dia ny fahadiovam-po amam-pahamarinana izany..."

Izany no vokatra antenaintsika amin'izao Paka izao sy angatahintsika ny fahasoavan'Andriamanitra mba ho fo vaovao ary ao anatin'ny fahamarinana ny ankalazaintsika amin'izao Paka izao. Nandresy ny ratsy tokoa i Kristy, nandresy ny fahotana, nandresy ny fahafatesana, ireo no lalivay taloha, lalivain'ny faharatsiana, fialonana, avonavona, fitiavan-tena, ho resentsika sy ho levona ao amin'ny fasana ireny rehetra ireny ka hiara-hitsangana amin'i Kristy isika tahaka an'i Lucien Botovasoa, ho lalivain'ny fanompoana, ho lalivain'ny fikatrohana, lalivain'ny fitiavam-bavaka, lalivain'ny fiainam-baovao, lalivain'ny fandraisana an-tànana ary lalivain'ny fandalinam-pinoana no entintsika mamakivaky an'izao Paka izao, ka ho tena génération bâtisseurs isika, ho taranaka mpanorina ka ho EOY mandray an-tànana amin'ny alalan'ny fitiavam-bavaka, fandalinam-pinoana sy ny firotsahana amin'ny fikambanana masina ary Eglizy Olona Velona tokoa isika amin'ny alalan'ny

fifanomboana fa indrindra ireo madinika eo amintsika, hampanjaka ny rariny sy ny hitsiny, hampanjaka ny fifankatiavana amin'ny fitiavana namana marina, ny firotsahana ny vaomiera masina hanompoantsika ny Eglizy Olona Velona izany, handray an-tànana tokoa ara-panahy, ara-tsaina, ara-nofo ny eglizintsika. Ho vonona hahafoy ny fiainantsika manontolo tahaka an'i Lucien Botvasoa sy ho vavolombelona, ary hanana faharetana hatramin'ny farany amin'ny fijoroantsika ho vavolombelona, hanana fitiavam-bavaka tahaka an'i Lucien Botvasoa, ho vonona mandrakariva hivelona ny finoantsika .

Miarahaba sy mirary soa ho antsika rehetra ary mandrotsaka ny tsodranon'Andriamanitra amin'izao Paka izao, ho Paka tokoa ny fiainantsika ka feno Aleloia. Mitoera àry ao amin'i Kristy ary izy hitoetra ao amintsika dia hamokatra be ny fiainantsika. Homba antsika mianakavy anie ny Tompo, Ho tanteraka tokoa izany ary hitsodrano sy hitsimbina antsika anie Andriamanitra mahefa ny zavatra rehetra Ray, zanaka sy Fanahy masina. Amen

Mompera Arseveka Mgr Benjamin Ramaroson